

此

庵

講

錄

上論講錄

戴經碧問時習章大意。蓋謂記書者。取此事以冠兩論之首。意必有所取義。學至時習。只見得苦處。如何得有悅處。旣曰朋來。何以又曰人不知。先生曰。苦處正是悅處。朋來處就是人不知處。若是人盡能知。則天下盡朋也。何以曰同聲而後應。同氣而後求哉。此無難辨。獨問此章何以冠二論之首。則起發卓絕。吾賢只將兩論中論學之書。如所云學之不厭。忘食忘憂。不遷不貳。敏事慎言等語。都撮在一處。去看此章。

首節。能出得範圍否。又將兩論中論友之書。如直諒多聞。會友輔仁。事賢友仁。忠告善交等語。都撮在一處。去看此章次節。能出得範圍否。復將兩論中論人不知之書。如所云不怨不尤。下學上達。將行將廢。皆命以主之等語。都撮在一處。去看此章第三節。能出得範圍否。則知夫子設教杏壇。任他大之說到聖神功化。小之說到日用飲食。離不了一箇學字。此學不是公之同人。便是不能達之尋常俗士。除却此兩種別無學者着脚處。只觀深造自得。左右逢源。便是首

段註脚。鶴鳴子和。聲應氣求。便是次段註脚。良其行不獲其身。行其庭不見其人。便是三段註脚。誠哉此一章書。不特可蓋二論之首。並可以該括六經中希聖希賢之學問也。經碧又曰。畢竟所學何事。時習何事。之字何指。先生曰。往曾對常。擎字云。只是穿衣喫飯邊事。擎字曰。果爾亦甚淺近矣。某曰。人只爲把穿衣喫飯。看得忒尋常了。所以人莫不飲食也。鮮能知味也。吾賢今日之疑。與向來疑夫子者。幾同于禪客風流。絕不爲人說破。不知學者平日。把這學字。看做

書本中事。不看做瑣瑣事。所以開卷時有學。掩卷時便無學。都是個誦讀而時習之。豈所云學而時習之也哉。不知學者自許爲聖賢。則自清晨櫛沐。以及脫履安眠。無時不是學聖學賢邊事。自深談性道。以至禮樂射御書數。無一事不是學聖學賢之功。故夫子設教一生。從遊者三千。而身通六藝者僅七十二。觀七十子身通六藝。便得列爲大賢。則知性道文章。原不曾裂而爲兩。而夫子之所以教學。與七十子之所以學夫子。都明白了然。豈禪客所云必須自證始

得哉。觀微起問悅樂之分。朱子分內外。是否。且夫子云樂亦在中。不改其樂。此處何以不曰不亦樂乎。而曰不亦悅乎。先生曰。分中外者且不必。悅字對學與時習看。我去悅之也。如知者樂水。仁者樂山的樂字。喜也好也。孟子曰禮義之悅我心是也。樂則人已暢適。如夫子之喟然于曾點。合此章的悅樂兩字。纔完得孔顏樂處的樂字。知得孔顏樂處。纔曉得時習之可悅。朋來之可樂。切莫錯會。

高勵昌問曾子三省。大約以三者事屬尋常。何致勤

大賢之省察。且人身至大者。君親而省身不及。何也。先生曰。君親惟最大。故不必去省。三者惟近于尋常。故不可不省。人只爲把這三者看做身外事。所以做出許多欠缺。不知從自己身上。仔細一體認。從朝至暮。除了此三者。還別有事麼。聖賢固學之本。只是主忠信。夫子又常曰。十室之邑。必有忠信如丘。可見忠信兩字。是聖賢真實之學。人却不知就在謀人交友之間。此處體認不真。便辜負師友不少。孔門第一章論學。只重時習。則傳習豈是輕易事。只此三者。終身

跳不出。終日跳不出。安得不省。人只爲把這人字友字師字。放在心頭。不打轉在身上。所以不能猛醒。若心上無此三者之見。而一一打轉在自己身中。有不瞿瞿自警者鮮也。諸賢友求之身。立地便是曾氏子守約之學。

曹木忻問吾十有五而志于學。還是便志到矩上否。且學是學個什麼。若說志到矩上。則學到矩處便是止境了。假若夫子更進而八十。豈遂無別境乎。先生曰。訓詁家久有此言。謂夫子行年七十而追序從前



得力之事。過此以往。未之或知。學問之無止境也。如此。又遂謂所志何志。矩也。此俱不看活句之故。學問做到從心所欲不踰矩。便是大易之所謂環中而應。是神化的境界了。豈是易到得的。若謂此後再有佳處。原非止極。則他知不如好。好不如樂。及可與立。未可與權以後。俱還有進步。樂與權。都非止極也。此只是說得好聽。而于聖人之旨未當。且云志到矩上。夫子當日便該說而志于矩。何以曰而志于學。且矩字是借來用的。其妙處不在矩而在從心所欲之不踰。

大聖人做功夫。豈是如今人立定一箇意思。求得當而便止的。所云志于學者。吾夫子在這時候。便知道吾人自合下來。無一事不是學得來的。千古聖賢的大道理。大事業。無一件不是可學而至的。所以決志去學。則自吾人穿衣喫飯。動靜云爲中。都是體認聖賢要緊處。那一時一事是放得過的。所以曰志于學。若必曰夫子所學何事。不是思量到矩上。墮訓詁之迂。則是謂夫子學處。原不曾說破。如禪家摸索在語言文字之外了。豈吾夫子之學哉。立者三十以前。徒

有此志。却自家植立不起。到此則此志屹然獨立矣。此志不能立。則事物尚不來搖撼。此志一立。則搖撼者日至。到此方能遇事卽了。遇物卽達。無復能搖惑我者。雖然如此。却是在事物上打疊得通透。而不能直達。夫物與無妄之本源。又進而到此。方知平日事物上。通透無礙處。原是天命來。恰恰如此。夫子到此。只覺得渾身上。是個天命流行。於穆不已。所以再進而六十。便能聲入心通。無所違逆。耳順者。只是鳥啼花落。觸處莫非天倪。耳順兩字。是夫子文法字法之

妙。非是耳。順目不順之謂。若必在耳字上作活計。則又要走在那耳根圓通上去矣。立者。見有事。不惑者。知有理。知命者。事不岐于理。耳順者。理旁通于事。到得從心所欲。則仍只見有事。因事付事。無一非此理之完固。學問到此。內不見己。外不見人。前此認定聖賢自家不敢輕動一念。此時則無念。不是與天命同流。無念。不是與聖賢同體。所以直曰所欲。並不諱言欲也。孟夫子每言規矩。而大學魯論。則單言矩。而不言規。何也。孟子每在器用上來比量說。學論則借字。

用也。若借到規字上。則圓處多而方處少。聖賢教人。每方處多而圓處少。說到從心所欲。則易涉于圓。妙在不踰矩。仍舊不失方的意思。明此益可以得吾人自治之學矣。今日學者。只須看夫子一箇大聖人。學問必待因年而進。而今人把吾夫子進學之年。不付之名利。則付之聲色。此道之所以不明。而人之所以不古也。悲夫。

史中黃問子游問孝章。大意蓋爲幹旋養犬馬無別。先生曰。聖賢教人。不說到極傷心處。不足發人深省。

孟子曰人之所以異于禽獸者幾希。又曰夜氣不足以存。則其違禽獸不遠矣。人到違禽獸不遠。還喚作得箇人。養親者至與養犬馬無別。還叫得箇人子。人能常提此念。放在心頭。真是芒刺在臂。欲少寬一念之敬而不可得。學者莫只自己欺顛。妄謂我實能敬。此念若不出于誠然。即使賢者亦不能免。只觀孟子所云曾子之養志。曾元之養口體。便知此道之難。便知聖賢教人。真是極痛切。極刻毒。須知三代以後。莫說求敬養者不可易得。即使求箇能養者亦不多得。諸

賢體勘自身。也有與父母同堂具慶者。也有違父母而遠遊者。同堂共慶。方飲且食于父母。何日是自己養父母之時。違父母而遠遊。則甘旨缺然。果能拜君之食而思遺父母以羹否。果能如仲由之負米南遊而生慨否。此時容易忽畧過去。將來必有樹欲靜而風不寧之悲。諸賢切莫草草。故夫子與門弟子言孝。最能發人深省者。惟此章與父母惟其疾之憂。人莫把這惟疾之憂。看做未成人以前之事。父母養子一念。真是眼光一日未墜。憐惜兒子之念。一日不肯少。

休。某有七十四歲之老母。日對四十六歲之不肖子。心心念念。惟恐某少有寒暑之不調。晨起問安。而老母必問及不肖。間有向左右服役。殷勤問及不肖子者。爲人子者。如何肯體貼此一念。克此一念。豈特寒暑風濕之不齊。方謂之疾。卽平日一舉一動之不慎。亦必致遺父母以憂。故曾氏子臨淵履冰。至易簣方知幸免。朱仲晦看到而今而後四字。直下箇一夕尚存。此志不容少懈。真正善得聖賢之心。孟夫子斷之曰。守身守之本也。諸賢常體此念。則知守身之爲孝。



諸賢常存養犬馬之一念。則當夫能養之時。必須如許世子之侍疾。曾氏子之養志。當夫飲且食于父母。及違父母而遠遊。時刻不放開箇養字。時刻不放開個敬字。就是身體力行的真實學問。豈待遠求哉。先生講此章時。座中有流涕不止者。先生曰。于此足知性善。克此可以明善。陸子靜鰲湖講喻義一章。亦無甚深遠之論。只是將喻利者。說到那功名念熱上。滿座爲之揮淚。講畢。朱仲晦長跼以謝曰。熹生平學問。實實未曾看到此處。至今以爲美談。諸友幸無忘却。

此日。

曹木忻問退而省其私。謂是燕居獨處否。先生曰。謂是燕居獨處。夫子好生信回不過。謂是相對坐談之頃。退藏于密之地。夫子一面與他言。一面又要省察他密處。則其待回太薄。而自處亦覺甚勞。此皆過泥文意。而不達語氣。須知此是夫子極得意于回。而極口稱美之。語氣甚閒。只開口兩句說盡。如今日有個極得意的學者。那先生見得他善于領會。遂說道。此人不達如愚。若是去退而省其私。他却亦足以發。這

樣看起來。此生不愚。豈其愚哉。其所云退而省其私。亦足以發者。想當然之辭。非真有箇私。真去省察他。也。若不如此理會。而必曰有個私。試問回之所發者。是何旨意。不傳也。故此書傳而子之與回言者。及回之足以發者。不傳。非秘而不傳也。聖賢面面相證。各不曾筆之于記載。而旁文無紀錄者。從何處傳起。故知拈此書而推原想像。要替夫子言字下作註脚。皆非善看書者也。何不打轉在白家身上。去看當日顏子在夫子前是如此。我若設身處之。能如此否。便有

自家警策之意。看來只是不肯愚。又生怕在師友前。像了個愚者。却不知愚字絕妙。大受用。大解悟。止在此。故曰不安于愚。是學者大病。

李萬咸問由誨女知之乎。大意問兩爲字。還是自認語。還是着功夫語。先生曰。此是直指吾人良知本體。全不涉功夫。兩爲字是自家檢別得歷歷分明。不敢自欺處。吾儒良知本體。以之照物。則妍媸立辨。以之自照。則分數悉陳。不到得十分燎然。自家信得過去。豈敢自認爲知之。其或有強認爲知處。只是個自欺。

若使不肯自欺。卽此自家檢別得分明處。便是此點靈明。不受一些障蔽。所以謂之良知也。姚江從此看得良知本體。人人具足。只欠一致字。某亦于此看得此點靈明。直用到不敢自己欺處。便爲擇善。便爲知止。便是致知。所以教人先明善。明得的。是萬善之同源。卽明不及的。亦原不碍此同源之極。但不必自欺。久久自然了徹。故夫子曰。是知也。

范素民問子張十世可知。大意蓋爲幹旋繼周一語。又疑子張爲卜氣運之修短而發。先生曰。世儒看夫

子近于私。看子張近于淺。故泥或繼二字。曲爲幹旋。又將子張看做識緯術數上着精神。夫子却將箇禮字來救正。不知聖賢皆有修明禮教之意。子張見得周末文勝。曠觀千載。江河日下。世運遷流。無所止極。將來氣運。莫說一二世。就是十世。也是看得見的了。故曰可知也。世儒都將也字看作乎字。無惟乎泥在求前知一過。夫子對他說世運如江河。雖然愈趨愈下。所恃以砥柱狂瀾者。猶幸有此禮。殷能革夏之命。不能革夏之禮。周能革殷之命。不能革殷之禮。過不

及處。可以容人損益。故可考而知。至于損益到不得處。卽兩代聖人。不得不因。可見此禮在天地間。真是  
一日離他不得。卽使文勝于質。究竟文亦範圍于禮  
中。只觀春秋何等時。臣弑君。子弑父。似乎三綱缺。五  
常滅。而究竟亂臣賊子。難逃斧鉞之誅。九鼎空名。猶  
在諸侯之上。非此禮之維繫而何。上觀三代。下觀千  
載。或有繼周而王。雖百世亦可知。豈但十世哉。可見  
學者。不問世道如何汗隆。氣運如何升降。只是以修  
明禮教爲己任。行之一家。則爲一家之禮。行之一鄉。

則爲一鄉之禮。一旦朝廷興起禮教。自然首問講禮之儒。豈可曰議禮者天子之事。典禮者宗伯之職。而姑聽之。禮失而求諸野哉。高平子問曰。既然禮可以輓回氣運。何以又說禮後乎。先生曰。有禮前之禮。有禮後之禮。禮後之禮。禮文也。損益到得的。故聽世運爲升降。禮前之禮。禮意也。損益到不得的。故能主持升降之世運。故曰。二代不得不因。百世俟之不惑。劉尊生問。夏禮吾能言之。謂坊間有致慨于杞宋之不振者。有云重看幾個吾字。謂是夫子慨然以文獻。



自任者。未。知。所。從。先。生。曰。若。作。帖。括。邊。事。無。不。可。者。但。提。衡。當。年。時。事。雖。善。不。尊。豈。得。慨。然。自。任。處。時。王。之。世。而。愾。想。杞。宋。之。振。舉。聖。賢。亦。必。不。其。然。此。書。中。意。旨。却。與。郁。郁。乎。文。哉。之。意。同。其。旨。原。在。言。外。意。若。曰。我。周。監。視。二。代。而。制。禮。其。所。因。所。革。可。考。而。知。原。極。妥。當。堪。爲。百。世。不。改。之。制。而。相。沿。者。浸。失。其。意。遂。使。有。心。者。曠。想。于。夏。殷。不。知。夏。殷。之。禮。吾。能。言。之。而。杞。宋。之。文。獻。不。足。以。徵。假。使。若。足。則。吾。便。能。徵。何。必。你。齷。齷。遠。想。學。者。上。觀。千。古。夏。殷。當。年。非。不。極。一。代。

之盛。而未免有今日之無徵。況乎生當明備之時。講  
究于夏殷損益之日。曾幾何時。而漸失文武成康之  
舊。爲文爲獻。猶當急急講求。以無失當年郁郁之旨。  
此是大聖人挽回氣運于禮運的大關鍵。言外有幾  
幾乎。將來杞宋。就在目前。況乎江河愈趨愈下。自周  
而後。寧復望有三代。所以亟亟乎定禮定樂。爲萬世  
作個法程。此之謂前知。所以曰雖百世可知也。豈是  
第二箇人能得的。莫徒作一章書理會。

宋直方問君子去仁。惡乎成名。豈非君子的仁。都是

爲名了。先生曰。昔人有云。三代而降。患不好名。夫子曰。君子疾沒世而名不稱。名豈可少哉。亦豈可易言哉。堯之蕩蕩乎。民無能名。是民不能名堯。至若堯成其個堯。便成了堯的名了。況此語原是反說的。重在仁。不重在名。名從仁上成。仁不從名上起。此心用在仁上。令聞廣譽。義問宣昭。名不可一日無。此心不用在仁上。即使有譽于天下。君子亦曰不虞。故曰穀聞過情。君子耻之。名不可一朝居也。吾賢欲從此書着眼。不要如從前說者。重看後段而畧首段。學問以求

仁爲主。若使寂守此心。把這仁字。當做深微玄妙之  
旨。一遇盤根錯節。便有違處與不違處。要做聖賢。只  
須打點精神。看十二時中。那一刻不是富貴貧賤。看  
天下人。自聖人以至塗人。那一個不在富貴貧賤中。  
終食也離不了富貴貧賤。造次顛沛。亦離不了富貴  
貧賤。除却富貴貧賤。別無吾人着脚處。除却欲惡。別  
無吾人用心處。除却不處不去。別無吾人作工夫處。  
人自三代以後。處富貴時。從道中看出無道來者少。  
從無道中要看出道來的儘多。處貧賤時。看出不以

其道而安之者頗多。心平氣和。要求個必有以致此困窮之故者却少。故不曰有道無道。而曰不以其道。則知不處不去。還落在第二義。公私義利。只在以其道。不以其道之一時。此一時。却如何認取。須知就在尋常欲惡上。聖賢原不遠于人情。處與去。只爲任情。不肯去求情。所以在常人。只教得箇欲惡。以他原不曾用工夫。君子直教做去仁。以他平日工夫。都在學問上。學問都在仁上。此處一差。將平日講強恕講立達取譬。都放在一旁了。如何叫得箇君子。可見此處

一念不親切。平時學問。全無些子干涉。所以做君子  
的人。無一刻是雜用心處。雖極之造次顛沛。無刻不  
然。把天地間不齊之遇。都打轉到心上來。便有此心  
落腳處。直方曰。畢竟富貴貧賤是境遇。先生曰。吾人  
那一刻離了境遇。終食便是境遇。離境遇覓心體。覓  
工夫。一入境遇。本體工夫。便有多少合不着處。如何  
能無入而不自得。若曰離却境遇。別有可用心處。待  
吾賢離了境遇時。再與你說。曹木忻曰。旣說箇道。如  
何又說箇仁。先生曰。道是總名。與富貴貧賤泰處的。

仁是不處不去的一念。是忝處那富貴貧賤的。陳百  
良先生曰。看書莫只究字義。要看立言者用心處。如  
求直方之問。是見得爲善無近名。先生之答。直見到  
君子疾沒世而名不稱。豈不是問答恰好對證處。先  
生曰。陸子靜義利公私之解。當初亦未說到如何是  
義。如何是喻義。只將利字說到人身極易犯處。令人  
不可躲閃。所以聞者下泪。而朱文公亦謂我平日不  
曾看到此處。諸賢若不徒作講書會。只某前說三代  
以後。從無道中要看出道來的儘多。便有如許警策。

在。可悲可涕。亦正在此。諸友切莫錯會。

戴經碧問。適莫比義之說。謂自古聖賢。如堯舜湯武。那一個是外得適莫的。如何纔是比義。先生曰。若去了兩個無字。單提衡適莫。則從古聖賢。那個跳得出這圈纈。天地間事。做到成功時。少不得不是適。便是莫。但看當初應事之時。還是有心。還是無心。凡事有個自然恰好的道理。我但無心去執着他。因事付物。絕無一些意必。固我之念。行到適處。也是義。行到莫處。也是義。若有一念執着。任他隨事度理。都成適莫。



了。堯舜之揖遜。湯武之征誅。都是義。不是適莫。義原不在適莫外。比之云者。如魚之比目而遊。折却一個。便行不動。君子周身都是義。那一時一刻。離了他來。故不曰比義。而曰義之與比。此個義。是極有斷制的。又是極能圓通的。惟圓通方顯得斷制。惟斷制纔叫得圓通。故曰義者事之宜。看比字。先看兩無字。看無字。先看之于天下。此是君子大機大用。全是在用處看君子。學者做工夫。只要把一個無適無莫的無字。常放在胸中。自無意必固我之見。自能徙義。故曰由。

仁義行。非行仁義也。

曹水忻問吾道一以貫之。蓋爲從前立論者。有謂忠恕卽一貫。有謂忠恕二字。離不了一心。不知夫子當日所謂一貫者。實是何物。之字實實何所指。先生曰。若謂忠恕是一貫。何以中庸曰忠恕違道不遠。若謂忠恕離不了一心。是又看許氏說文矣。大旨之錯。只爲將曾子忠恕二字。看作悟後語。又將一呼一唯。一唯一出。看作禪家棒喝機鋒印證語。所以將夫子活潑潑地一句書。死死捏作一貫兩字看。不知夫子設

教四十年。並不曾輕易許可一人。好學如顏子。只說得個其庶幾乎。又曰吾見其進也。未見其止也。顏子如此。其他可知。其所以呼參者。蓋爲他資質魯鈍。求道之心最苦。半生精力。都用在之處。東摸西探。茫不得個靶柄。假使夫子早與他說破。必不得力。任他極力摸索。到得此時。方與他一句點出。說吾道一以貫之。都在理事相徇。作功夫處說。語意極圓通活變。並不曾指一是何物。貫又是何物。亦非如禪客風流。掃除一切。認定萬法歸一之理也。此時夫子如看迷路。

人指引他一直去。曾子此時如岐道正迷。一聞指點。力悔前誤。擦起便行。所以唯夫子見他趨向既定。更有甚麼說的。所以便出。又豈禪客規模。撒手向外去。作把臂同行之隱語也哉。曾氏子因門人一問。直覺得忠恕兩字。一生受用他不盡。前此日日在忠恕中。却拈他不出。今日一經提掇。直覺得夫子之道。莫切近于此。依舊在功夫一邊說。連夫子所謂吾道。曾子所謂夫子之道。都如所云大學之道的道字。非指斯道之本體而言也。只觀他日對多學而識之子貢。亦

下此語。則知聖門惟有二賢。下得此服藥。其他用不着也。戴巖犖曰。何以先不與他說破。先生曰。此之謂善誘人。惟顏子爲能覷破。乃知聖賢教人。一步進一步。一層深一層。都是誘他向前去。如以一物誘孩子學步。少不得一步步移了去。到得力量能自己將行。方知慈父慈母之憐兒。設盡許多方便。從古迄今。那一個不是被人誘的。故曰不勉而中。不思而得。從容中道。聖人也。

曹水忻問君子喻于義。謂先儒有深嗜篤好兩解。先

生曰。若將四字解喻字。是義果在外。非由內也。吾只  
看四體不言而喻。與所藏不恕而能喻諸人兩個  
喻字。亦解作深嗜篤好。可乎。朱註猶曉也三字絕妙。  
君子胸中乾乾淨淨。只曉得箇義。小人心中不能乾  
淨。只曉得箇利。所謂利者。亦非單指到財帛上。所謂  
小人。亦非單指着貪賄之鄙夫。天地間只有此義。君  
子于大本領處認得真。有時做到利天下。利萬世。無  
事不占便宜。却都是義。以其胸中原只曉得義。所爲  
正其誼不謀其利是也。小人于本領處認不真。卽有

時做到希聖處。希賢處。一舉一動。都明明要取義。而其實着着都要討便益。所以彼自見以爲義。而聖賢則見其爲利。以其胸中原只曉得利故也。學者做工夫。此處最要明了。預先一眼覷定。直將此身安放在甚麼處。如安頓在君子一流。還你無處不是義。若不然。無往而非利也。然放在君子一流。豈是你硬硬推進得去的。只將大本大源處。直截了當。拚一副必爲聖賢之志。而後可爲聖賢。陸子靜。白鹿洞。說此書後。人謂只說得儒者病痛。不曾一字說着此書。却不知

他字字是教人做君子。念頭一錯。便做到小人。君子  
小人之分。幾希之間而已。可不慎歟。可不明善以爲  
誠身之本歟。

郝米滌問德不孤。大約謂天地間。君子有君子之黨。  
小人亦有小人之黨。德自然是不孤的。夫子何以言  
此。先生曰。若使德不是孤的。天地間只該有君子。那  
得有小人。凡爲君子之志不堅。爲君子之力不猛。都  
只看得道德是孤的。夫子急與他一服安神定志之  
藥。說個德不孤。必有鄰。米滌曰。又如何見得不孤。先



生曰。天下極不肖的人。外面是這樣做去。此心一念萌動。所爲清夜自思。平旦之氣。何嘗說聖賢不是。閒居無所不至。見君子而厭然。便是不自欺了。此處就見得不孤。水滸曰。這等說。便是無人無德了。先生曰。不然。小人只那一時。那一刻。見得如此。過此一念。畢竟是小人。其曰不孤云者。同之之辭也。必有鄰者。隘之之辭也。惟其隘。所以僅曰不孤。無怪乎天下之君子少而小人多也。只可惜小人這一念。是聖賢全體發露。而自取咎亡。隘我芳鄰耳。可不爲之嘆息。

秦正公問子使漆雕開仕。還是因他有可仕之材。還是如家語所云年長且貧之說。先生曰。若是因他材。可出仕。則七十子都不如他。而由果求藝等輩。豈盡不可使乎。若謂年長且貧。則七十子中。未必無長且貧于開者。此俱不看全書血脉之故。須知紀魯論者。記此書。非紀使開之仕。紀開未能信之一言也。想夫子當年。使人仕者儘多。而開獨有此一言。真足動夫子之色喜。所以記之。如何不在此處着眼。而向使開字活計也。有一友問斯字之旨。先生曰。可恠看書者。

不平實商量聖賢的言語。凡遇斯字。與在中字。便要  
沒啞謎一般去猜。都爲禪客家有。不說破三字。不知  
吾儒絕不作影響語。只觀無行不語。何嘗有不肯說  
破之事。大凡斯字。與在中字。都就在本章語氣文法  
上領會便了。

胡保寧問夫子之言性與天道。還是在文章內。還是在  
文章外。先生曰。文章朱子訓作威儀文辭。便見到  
無行不與處。子貢說到此。亦早看到無行不與處。爲  
他平日一向求夫子以言。却不知周身舉動。無一處

是到得這一日。方見得夫子一舉一動。一言一默之間。都是文章。文者如文人之文。章者如斐然成章之章。說做動靜語默。學者還有着眼不着眼處。把來當作文章。則夫子滿盤托出。都在學者見前。盡人皆可聞。若不于此處認取夫子。只要在言論上去求夫子。就是終日與你言性。終日與你言天道。還管一字也不可得而聞。何也。學者從事于夫子。那一個胸中。不曉得個性與天道。那一個做工夫。不要在性與天道上着脚。却不知此個物事。是說向人不得的。縱使

立言者。披肝露膽。說將出來。極明白。極通顯。而聽者。終是愈聽愈疑。愈疑愈不明顯。直覺得越說越晦了。如何可得而聞。故某嘗曰。爲文章。爲性與天道。都是學者分別知見。可得聞。不可得聞。亦是從學者得力。與不得力處。分別起見。在夫子只是個吾無行而不與。二子便了。此子貢反約之一時。當在與聞非也。予一以貫之之後。吾賢此處覷看。還是在文章內。還是在文章外。當自有悟入也。

季萬咸問。子路有聞。大約爲紀魯論者。原是取子路

之勇于行。而夫子曰有父兄在。又似不許其勇行者。豈聖賢所見如此其不同乎。先生曰。夫子是因子路來問。故與他對症下藥。故曰。由也兼人。故退之。至于記魯論者。則止見仲由一派勇行的力量。真是人所難及。說此書者。先要看一有字。學者是處留心。隨地皆可體認。此個聞性。直與無行不與。靚面相承。若使聞性現前。目前花落鳥啼。都成妙義。假使聞性不能開豁。卽同堂講頌。如風過疎籬。管取毫無干涉。此處說未之能行。不是虛心攬物。天地間物理相徇。不留

心去行。便覺得從容暇豫。若實實體認將來。卽終日行。終身行。何曾有行得了。住得足的時節。此聖賢立言。所以不曰敏于行。則曰先行。曰耻躬之不逮。惟恐云者。不是將後來之恐。勉前此之聞。只是當下惡惡求行之心。惟恐將從前得意之事。向從容暇豫處。輕輕放過了。何以發付繼此而聞者耶。學者若是常常將子路這副心腸。閣在眉毛下。何愁做不出個聖賢。然要須平日眼光明亮。若眼光不明。可聞處都辨不出。如何謂之有聞。故人知子路聞後之心。不可幾及。

吾獨謂子路聞前之心。非尋常人所能及也。此陽明所以要致知。其所以要明善。

莊玉驄問回也其心。三月不違仁。三月之後還有違仁的時候否。不然何以直曰三月。若謂三月是時序之一小變。畢竟是有程限的日子。豈顏氏子猶未做到純仁的田地乎。先生曰。三月二字。對下邊日月字下的。爲其餘是或日或月。便覺得顏氏子如此其久。若非爲日月至三字。則三月兩字。可不必下。三月只是言其最久。非三月後便把捉不定之謂也。若使把



不定。縱使他三月也。少不得筭做日月至。豈所云不  
違也哉。某常對學者言。顏子只爲認得此心之外無  
仁。故直守此心。而仁體完滿具足。所以不特有仁字。  
竝有個心字。諸子只爲心外覓仁。故有時覓得着。亦  
有時覓不着。所以日月至。故夫子口中。不特沒心  
字。連仁字也不下了。諸子如客覓行臺。去來不得常  
主。顏子則如自己坐在家裡。那裡有一日離了堂與  
的時節。諸賢切須自會本心是萬物同體的主宰。管  
教與顏氏子把手同行。若從心外覓仁。還管摸不着。

一個仁字的註脚。明此之謂明善。

費歟卿問既謂之儒。何以又說小人。旣曰小人。便不得謂之儒了。陳百史先生曰。也少不得要此一問。先生曰。小人也不是等閒的。從做學問處。見得天地民物。皆我性分中事。便見得極大。便是君子。若從天地民物上做學問。却處處只管照顧自己。守經而不能行權。得體而不能達用。便見得小了。便謂之小人。所以體欲其全。而後能用盡其大。學者全體不能畢舉。則大用不能見前。子夏篤信謹守。只爲所見不大。學

者只看聖門如子夏。夫子尚吃緊與他辨君子小人。則知爲學毫釐之差。千里之謬。所爭正不在多。今日與諸賢商量。作功夫。刻刻不要把天地民物放開了。所以夫子處春秋之時。栖栖皇皇。三月無君則弔。及至世無用我。而直任天子之事于筆削之間。取前聖垂世之書。刪定贊修而不輟。只爲他見得極大。陳曰。史先生曰。別處說君子小人都。是判然兩開的。此處却同是一儒字。必須先生下一二語。使學者朗然纔妙。先生曰。別處是分別君子小人的界限。此處是就

爲儒者之器局而言。別處是閒閒提衡箇君子小人。此處是與子夏下對症鍼砭之藥。

李萬咸問知者樂水章。將仁知分作六段。而註疏中。遂有分情體效三種者。畢竟如何。先生曰。將動靜二字作體。已自不是。猶醜是個效字。夫子滿腔中。是箇知仁。不覺爲他閒閒點綴出許多佳話。當年卽要說仁者樂水。知者樂山。亦自使得其所爲樂水樂山者。非一味要去那水邊山下。各尋生意。亦非見山便沒趣。見水便不怡。只爲他胸中明皎皎的。不受一些渣

滓。與水之意趣相宜。及至面對孤峰。依舊樹影山光。都是天機流蕩。故曰樂水。仁者胸中。安妥妥地。不受一些搖撼。與山之意趣相宜。及至面對川流。依然淨靜無波。都是天機澄湛。故曰樂山。何也。爲他一個是動的。一個是靜的。究竟動中未嘗無主。靜之意在。舍靜以言動。動便是躁妄。靜中未嘗無流動之意在。離動以言靜。靜便是枯槁。所以一個生趣滿前。卽在可憂可懼之中。而快然自得之理具足。一箇生意滿腔。卽在朝聞夕死之時。而與天地同悠久之理具足。總

之聖賢言語。要看得活。莫看得死。只觀仁知兩者。豈不是天地間純粹以精的人。而畢竟山水動靜仁壽各從其性。足知道夫子所云仁者見之謂之仁。知者見之謂之知。百姓日用而不知。爲他學問非不純粹以精。終不免分道之一體。學問做到這田地。尚不免分仁分知。今人連仁知的邊岸。尚未夢見在。而便目逐于山情水意之中。妄談動靜。妄求樂壽。不亦可哀哉。信乎善之不可不明也。

高平子問博施濟衆。夫子說堯舜猶病。是言仁如此

其難。後說立人達人。就在欲立欲達。豈不是言仁又如此其易。先生曰。仁原至易。人求之難。仁原最近。人求之遠。首段非病仁之難。病博施濟衆之難也。平子曰。欲立欲達。如何便能立人達人。先生曰。此節全沒工夫。是槩論仁者之全體大用如此。工夫在能近取譬四字。近者已也。欲也。近取已之欲是如此。便譬之人的欲也是如此。此孟子曰強恕也。曰求仁莫近也。曾子曰。夫子之道。忠恕而已也。中庸曰。忠恕違道不遠也。故曰。可謂仁之方也。李蕩咸曰。立達兩字何解。

先生曰。立也者。爲天地立心。爲萬物立命。爲自己立身。此天子所以曰三十而立。可與適道。未可與立。學者舍却天地萬物。從何處立身。舍却爲天地立心。爲萬物立命。卽生于天地之間。都是一團戾氣。與禽獸何異。達者在邦必達。在家必達。孟子之所謂無他。達之天下。中庸之所謂和也者。天下之達道。皆此物此志也。吾人在天地間。民吾同胞。物吾與也。這一副生生之意。誰人不要。植立得住。推此一念。人與我。真是一體聯屬。真如通身血脉。欲他流通。不欲他壅滯。一



處壅滯。便不能通達。學者只爲不覩到這裡。便不能強恕。所謂不明。如何能誠。卽使有志于聖賢。便要走。到博施濟衆上。極難極遠處了。如何能得那萬善同源之極。所以學者務先明善。

王宜生問德與仁如何分別。序游藝于依仁之後。將藝看得恁般輕。何以孔門依仁者少。而身通六藝者七十二人。先生曰。若問分別。不特德與仁有分別。連道與德亦有分別。若說無分別。不特道與德無分別。連德與仁亦無分別。其曰分別者。道散于萬事萬物。

德體備于已。仁醞釀于心。其曰無分別者。萬事萬物。莫不有個當然之理。以其一舉一動。踏着便是。如大略然。則曰道。以其一舉一動。日用持循。非此便無主宰。則曰德。以其各還以所當然。萬事萬物。都從此遂生復性。則曰仁。其實總是此一本萬殊。萬殊一本之理。特道字說得廣大。德字仁字。說得精微。道字是德仁的統體。德是以此道守之于已。仁是以此道純之于心。志卽夫子十五而志于學。據是立與不惑。知命耳順的境界。依仁游藝。則從心所欲。不踰矩也。游藝

者水流物生。莫非天趣。鳥啼花落。總是天機。可以吟風弄月而歸。可以會吾與點也之意。此正是道德仁。真實親切受用。絕不復作迂腐道學。束手縛脚。一步不敢動作的局面。工夫到此。纔是真正理學。纔是真正做聖賢。只觀夫子與人歌而和。與點春風沂水。何等不自在。何等不受用。不似腐道學。聽得唱曲兒。便像污了他的耳。此伊川所以惡明道齋頭之妓。王陽明看到夫子與點處。便說伊川到此。少不得要罵起來。可見聖賢學問。原有這一步游行自在的受用。豈

與七十子之通藝。同日語哉。

李萬咸問仁遠乎哉。先生曰。會得已。欲立而立人。已欲達而達人。便知道此書落處。欲仁斯仁至。夫何遠之有。高平子曰。顏子三月不違。其餘日月至。可見仁原不遠。先生曰。顏氏子之于仁。可謂不違。其餘則求之遠在。何也。顏子卽心卽仁。所謂欲仁仁至。其餘心外覓仁。所以有到得仁上處。有到不得仁上處。故曰求之于遠。萬咸曰。何以欲便能至。先生曰。某之所謂欲。非吾賢之所謂欲。某之所謂至。非吾賢之所謂至。

吾賢將欲字看作好樂。至字看作來復。假若天地間。有個仁可好。樂便去扳援歆羨了。有個仁體來復。便原非取携自我了。終是向外馳求。是孔門諸子的學問。非顏氏子學問。某所謂欲。則指理欲之欲言。其所謂至。則指至極之至言。人從天命後。性都落在喜怒哀樂邊。其未發者。但未發耳。情從此生。便謂之欲。此欲用在自私自利上。便不仁。用在萬物備我上。便仁了。欲立立人。欲達達人。此欲便無不仁。夫子之所謂不踰矩也。此欲不仁。卽勉強求仁。有時到得仁上。終

是有分量的。此欲既仁則仁之全體大用無不明。而物之表裡精粗無不到。此心是沒分量的。這仁也就沒限量的了。故曰我欲仁斯仁至矣。若曰首句遠字。喚起末句至字。此尋行數墨之學。非夫子立言本旨。亦不便于學者作工夫。吾人明善不真。終日說理說欲。都同說夢。若明善親切。欲便是理。是將欲去作出理來。就是真正聖賢。非天地間別有個理。爲作聖作賢之階也。故曰學者先明善。

方禹符問民可使由。恰像不要民知的。豈不是愚百

姓了。先生曰。此是就民身上說的。兩使字。不是着力語。緊跟可字來。夫婦可以與知與能。此可使由之也。人莫不飲食也。鮮能知味也。行之而不著。習矣而不察。終身由之而不知者衆。此不可使知之也。若可使知之。便是君子。便是聖賢。豈徒曰民哉。吾賢只觀終日由。終身由。由處與聖賢無二。而究竟不免于凡民者。只爲知體不能見前。此姚江所以教人致知。某所教人明善。到得今日。莫說知之者少。卽由之者。亦未易得。若使人盡能由。夫子何以說誰能出不由。

凡何莫由斯道也。哀哉。

吳价仲問。回天縱之將聖。大意謂既說固字。如何又說將字。固者決辭。將者疑辭。豈子貢亦見之未定歟。先生曰。學者只爲視子貢太高。故作此疑。子貢平日若真知確見。認得夫子是箇聖人。必不肯敵面來說箇夫子聖矣乎。此書在太宰心中。認定多能爲聖。譬之此身在桎梏中。不能自解。子貢乃不與他急急解脫。却又與他添上一重桎梏。說道又多能也。子貢之病。不在上句。却在下句。固字對又字說。不對將字說。



則知子貢錯處。不在將字。却在又字。夫子問得如此。直覺得子貢忒不唧溜。如何能使太宰豁然自釋。所以直下喚醒他。說箇太宰知我乎。旋即指出多能的緣故。說道吾少也賤。故多能鄙事。而又直陳出自己脚色。曰。君子多乎哉。不多也。此段說話。不特使太宰廢然自返。識平日測聖之非。尤能使子貢如冷水澆背。頓曉立言之誤。又不惟使太宰子貢在局中者。曉然于夫子之不貴多。並能使旁觀者。立見夫子于無行不與之地。故牢曰。子云。吾不試故藝。夫子不讓子

貢而呼太宰。太似放開誤投藥餌之庸醫。直向病人  
猛下鍼砭。子貢未去多之夙智。大似刻舟求寶劍。而  
琴牢猛悟子之夙言。則酷似望氣識豐城者也。覲徵  
曰。果爾。何以孟子又曰。宰我子貢。智足以知聖人。先  
生曰。直就他見禮知政。聞樂知德。生民莫違處。見他  
知聖之智。若不看出他們差別。則朽木不可雕。糞土  
不可圻。與短喪之不仁。豈是智足知聖者之事。而賢  
于堯舜之一言。則非智足以知聖者。不能道也。故知  
子貢之對太宰。必在未聞一貫。及得聞性與天道以

前此淺深之所以不同量也。

戴巖竿問曰。先生曾謂夫子不曾輕易許可人。曾氏子亦不得作悟後語。然則顏子喟然之歎。亦不得作悟後乎。先生曰。只爲他做到那欲罷不能處。才竭而卓立見前此之力量。竭盡無餘。後此之欲從。又末由已。不覺得喟然發歎。形容到仰鑽瞻忽處。而始信夫子之循循善誘也。從約看博。博處是誘。從禮看文。文處是誘。到得欲罷不能。吾才旣竭。連約禮亦是誘我耳。纔現得一箇面目。如有所立。及至欲從。却又由不

得我不連這如有所立者。並爲誘我之物乎。嚴犖曰。畢竟孔顏地位何如。先生曰。只將從心所欲不踰矩。對看雖欲從之。末由也已。便知孔顏分別何也。爲他一箇是從心。一箇是將心去從那卓然如立之物事。所謂有這個在。嚴犖曰。然則孔顏曾思孟若何。先生曰。夫子爲道源。所從出。體備帝王。周身是個天地。顏曾未見全聖之體。然涵養自是純粹。子與立見全聖之體。而涵養純粹。不逮顏曾。子思子見足以開子與而純粹過半。總之夫子之聖。是親自做到那裡。顏曾

是極力求到那裡。思孟則已親見到那裡。而非親做到那裡。故俱謂之大賢。又如宋明諸大儒。非不有直窺到孔孟淵源處。直發揮到孔孟淵源處。而涵養力量。豈遂得謂之做到孔顏處乎。

費殿卿問子在川上。所云逝者二字。還是歎水。還是別有會心。先生曰。學者大本未明。無怪處處穿鑿。如一切在中字面。便要歸到心上去。一切斯字。此字。便要歸到極玄極妙。不可以言語形容上去。又如此章之所云逝者。遂謂夫子別有所指。不過借水以發明。

此之謂泥聖愈深。則求聖愈遠。大非吾夫子平實商量。易簡而理得的學問。須知大聖人胸中。活潑潑地。隨處都是這一着。子偶在川上。看見水。水便是這一着。子不覺喟然發歎說。逝者如斯夫。不舍晝夜。說水便是說水。何曾又別想到甚氣化流行。同此運行于不息。如後儒許多節外生枝之說話也哉。不曾想到微妙處。而微妙之旨。却就在水上流出。夫子就水言水。而不覺微妙之旨。亦隨言流出。故謂讀夫子此書而別有會心。則可謂夫子當日因川上之水而別有

會心則不可以其求夫子太迂。非大聖人活潑潑地之本旨也。只看孟夫子因徐子之問而想到源泉有本。便知道讀聖賢書者。當別有會心之妙。

雷雨若問共學一章。還有次第否。先生曰。吾友看來。畢竟還有次第否。雨若曰。像是沒有次第。先生曰。試以十五志學一章。配此章看。學是學了。志字中有適道之意在。立便是立了。後面都是權的事。若使無次第。在先師分中。何以必須因年而進。須知悟與證。原是兩事。悟可以徹首徹尾。一刻了當。證須是一步一

脚着實踏將去。悟是致知一邊事。證是力行一邊事。知行合一者。以見不行不叫做知。縱知亦是光影。非謂知了便是行。此孟夫子始終條理之說。爲極得聖知之解也。權字有看作通立之窮者。此是權字的後半分。與經字對的。前半分。乃是權然後知輕重之權。銖兩分明。方能通權達變。學者到此。若不是這個權衡在手。管取都要走在毫厘之差處。看到此。連執中無權的權字。也要作權衡看。方于執中有合。不然夫子到七十時。只消說個從心所欲便了。何以必曰不



踰矩。